

EUSKARA. Sentsibilizazio kanpaina abian jarri eta gizarte eragileekin bilduko da batzordea datozen hilabeteetan

Bai Euskarari akordioa bultzatzeko jarraipen taldea osatu da Barañainen

Kontseiluko Xabier Mendigurenek «eredutzat» jo du herri horretako euskararen aldeko lana

Eduñe Elizondo | BARAÑAIN

Barañaingo Bai Euskarari akordioa bultzatzeko jarraipen batzordeak lehen bilera egin zuen atzo, herriko etxean. Aurretik, jendaurrean agertu ziren batzordeko kideak, proiektuarekin bat egin duten Barañaingo hainbat lagunekin eta Kontseiluko idazkari nagusi Xabier Mendigurenekin batera.

Mendigurenek, hain zuzen ere, Barañain euskararen aldeko lanaren «eredutzat» jarri zuen bere solasaldian, era askotako ikuspuntuak dituen jendeak bat egin duelako Bai Euskarari proiektuaren baitan. Jarraipen batzordea osatzen duten hamazazpi kideen artean, adibidez, PSNko zinegotzi Jose Luis Tejero dago; Sahats elkarteak gonbidatutako ordezkari politikoetako bat da bera. Udalak izendatutako en artean ere CDNko Teodoro Hernando dago. Batzordean, halaber, hainbat gizarte eragilek, euskararen aldeko herri ekimenetako zenbait ordezkariak eta aholkularitza teknikorako hiru kidek bat egin dute.

Jarraipen batzordearen lana izanen da Barañainen euskararen alde egiten diren urratsak zabaltzea eta babestea, eta herritarren partehartzea bermatzea. Batzordeko eta Barañaingo Sahats euskaltegiko kide Joxe Ramon Olanok azaldu



LANDER F. ARROIARE / ARGAZKI PRESS

Barañaingo batzordeko ordezkariak, Xabier Mendigurenekin batera, atzoko agerraldian.

zuen sentsibilizazio kanpaina abian jartzea eta herriko gizarte eragile guziekin harremanetan jartzea izanen direla taldeak egiten dituen lehen urratsak. Asmoa dute, halaber, ekitaldi publiko bat egiteko hil honetan bertan, herritarren aurrean azaltzeko proiektuaren nondik norakoak.

Aldeak baztertu lan egiteko

Xabier Mendigurenek gogoratu zuen Euskal Herri osoko ehun

bat herritan dagoeneko mar txan direla Barañaingoa bezalako batzordeak, euskararen aldeko lana bideratzeko, Nafarroan bertan ere bai. Barañaingo herritarren ahalegina, hala ere, biziki eskertu zuen Kontseiluko idazkari nagusiak, «aldeak baztertu eta elkarrekin lan egiteko gai izan direlako, denona den ondare eta altxor bat babesteko».

Nafarroako Gobernuak ere Barañaingo eredua kontuan

hartu eta jarraitu beharko lukeela nabarmendu zuen Mendigurenek, eta Barañainen lortutakoa beste toki askotan ere lor daitekeela gaineratu zuen.

Barañaingo Udalak joan den otsailean hitzartutako aurrekontuetan 36.000 euroko partida onartu zuen Bai Euskarari proiektua bultzatzeko. Joan den uztailaren 30ean, berriz, akordioa sinatu zuten Udalak, Sahats elkarteak eta Kontseiluak.

Baionako auzitegian Poliziak erabilitako bortizkeria salatu dute Demoek

Erredakzioa | BAIONA

Demoek gogor salatu dute joan den ostegunean Poliziak Baionako auzitegian erabili bortizkeria: «Gela baten barnean negar-gasak botatzea arduragabekeria da, bereziki haur eta zaharren gainera egiten delarik». Demoek jakinarazi dute Poliziaren bortizkeriaren ondorioz bost pertsona erietxera eraman behar izan zituztela, amasa hartzeko zailtasunak eta begietako eta aurpegiko erreduak sendatzeko. Bideanabar, ezarri dieten isuna ez dutela onartzen eta ebazpenari deia egiten diotela adierazi dute Demoek. Gertakariaren ardura nagusia SNCF konpainiari leporatu diote, eta euskaltzaleei eskatu diete SNC-Feko zuzendariari idatz diezaioeten haserrearen adierazteko. Horrekin batera, euskaltzale oro deitu dituzte abenduaren 17ko auzira.

Dezentralizazio legeari lau ekarpen egiten dizkio Hizkuntza Kontseiluak

Erredakzioa | BAIONA

Hizkuntza Kontseiluak dezentralizazio legean lau puntu sartzeko eskatuko du gaur Saliesen egingo den bilkuran: euskarari ezagutza ofiziala ematea, Frantziako Konstituzioaren 2. artikulua ezabatuz; hizkuntza eskumenak lurraldeei ematea, mugaz gaindiko harremanak sendotzeko; hizkuntza politika handinahia abian ezartzea eta Euskal Herriko Hitzarmen Bereziko hizkuntza atala sendotzea, itzulpen gintza erakunde profesionala sortuz.

Hizkuntza Kontseiluak dio euskara egoera larrian dagoela Ipar Euskal Herrian. «Euskara sustatu eta aitzinarazi nahi duen hizkuntza politika boluntarista gauzatu behar da», erran du Eguzki Urtega Hizkuntza Kontseiluko idazkari nagusiak ohar baten bidez.

Desobedientzia aldarrikatu du EHEk Gernikako epaitegiaren aurrean



Euskal Herrian Euskaraz taldeak (EHE) elkarretaratzea egin zuen atzo arratsaldean, Gernikako (Bizkaia) epaitegiaren aurrean. Beste 2.000 herritarrekin batera erakunde horren aurrean intsumiso deklaratu ziren hiru kideren atxiloteta salatu zuten bertaratutako 60 lagunek, tartean Lekeitio eta Gernikako udalako ordezkariak zirela. *Hizkuntza zapalkuntzaren aurrean desobedientzia* zioen pankartak. Herenegun, Pernan Basterretxea atxilotu zuten; atzo goizean, Karmele de Otegi bermeotarra eta Asier Basabe gernikarra atxilotu zituen Ertzaintzak. Epaitegira deklaratzera eraman ostean, aske utzi zituzten. Beste bi lagun bilatzeko eta atxilotzeko agindua emana dago.

MONIKA DEL VALLE / ARGAZKI PRESS